

客越志略



光緒辛巳初冬

容越志略

陳彖署檢

客越志略



姬吳王稗登撰

歲丙寅五月余方有事於故相國袁公之喪以十二日壬寅治裝余未識南行道里既從書肆買圖經載麓中又要友人管建初同去建初昔歲曾探禹穴爲余談兩浙山川曲折若在掌上故遂挾之行黃徵君一之阮都尉時濟皆爲詩贈別已而王青州伯仲從東海來聞余行作壯士言相賞易水悲風不覺蕭蕭座上生也坐久日斜不及發

十三日早出金昌門泊垂虹亭下與建初對月賦詩

客越志略

一

十五日嘉興南行十五里斗門十五里阜林徐海獺時阮中丞在桐鄉嬰城自守宗將軍以無援戰歿於此朝廷贈官官其子有司立廟戰場曰忠魂宗名禮關中人官遊擊將軍驍騰善戰約束部伍有古名將之風戲下六郡良家仗飛射虎之士能談故侯將略往往爲之雪涕以此人知其得士心今其祠在水涯土人多有薦蘋藻者五里石門地饒桑田蠶絲成市四方大賈歲以五月來貿絲積金如邱山家及有年亦在顧余舟中爲言路難憊勞良苦雨濛濛不休倉忙解維十八里泊崇德城外燈下焚枯魚佐酒夜雨

益甚

十六日稍霽四十五里塘栖河廣百尺隔河人聲不相聞星橋橫空如白虹沈沈下飲波上過塘栖水益闊桑益多魚亦益賤青田白鷺小船如瓜葉葉烟波中有濠濮閒想望見吳山翠微神思翻飛不可復禁四十五里至杭州北新關司徒主事奉命權稅其地官衙壯甚設鹿柴於河中兩端鐵絙維之以譏舟楫大倍於吳中許市

十七日新晴見青天人意欣暢入關泊德勝壩僮輩入城僦得邸舍過午併當箱篋擔夫三人尙有餘力

客越志略

二

此雖土人猛憨亦可知客子橐中如水耳兜子輕如馬蹄余以畏日獨買一巾車然不若兜子快意從武林門入風景大略似兩都人家門外悉是冬青樹憶讀杭州志云洪武閒都指揮徐司馬所栽今有如拱者當猶是其舊植蒼翠鱗鱗屋瓦盡碧略如山家青靄人從樹裏行不見赤日小樓黑戶副以短扉緯蕭作垣加墁其上門門金像奉浮屠氏甚崇每慧燈不戢卽千家爲墟故臨安大火非一燎矣婦人低鬟胡粉傅面都作女郎妝小兒白雪椎髻甚多美少年蓋山川淑清生人韶秀亦如吳中然也邸屋在八字橋

人家甚湫欲遷入吳山上道士觀聞霜臺爲隣遂不
果買輿訪陸丈陸丈吳人余姻也爲布政幕僚近擢
海豐丞將去與余久別亟欲見時大方伯視事堂上
不容闌入

十八日路淖乾去訪陸丈相見烏烏有安仁拙政之
歎行李已出關外空堂如水吳山樹色半入衙齋吏
散鴉啼廳事閒有雲氣真仙吏也問秦觀察顧杭州
俱出候使者於江上未歸命官廚飯余辭以西子久
待爲之媯然而別遂要建初出遊同行者爲黃秀才
從錢塘門出山色層層如芙蓉千片欲插入人鬢人

客越志略

三

家斷處見湖色一星兩星過溜水橋湖波注其下作
瀑布聲憩昭慶律寺舊爲浙西叢林第一設戒壇其
中每歲上已推高臘者一人登座說法雲水攜錫來
受戒者無慮千萬居士長者道品度門爲之護法四
方檀越布施金錢山積大爲常住之利今寺爲兵燬
開府胡公助貲重建使者逐游僧戒壇不復開髡徒
不逞幾有戒心恐亦小功之察也過寺折而西湖光
如鏡千峯萬岫寫影其中入大佛禪寺寺在寶石山
麓一峯數仞僅刻半面飾以黃金射水如月傳爲始
皇繫舟石傍有沁雪泉深廣可二尺大旱不枯黃塵

赤日之困到此盡消遊侶一斟而出山巔保淑塔不
及登緣岡被磴水竹叢叢邱丹谷翠人家如碁布雞
鳴犬吠皆在雲中矣北行二里葛嶺下爲岳武穆王
祠廟貌英英有中原金字遺恨同遊肅拜相顧骨竦
我輩白面生亦復英雄淚下朱殿半圯官爲修葺材
器苦窳粉飾目前而已從廊間小門入當路有分屍
檜英皇朝郡丞馬偉鋸檜中開下離上合以當商君
車裂至今不彫青塚一坏金甲葬其下無復有象祁
連山色者範金作獄囚三反接五木鴈行跪其前中
爲秦檜一是其妻王氏一卽万侯高焄獄得爲大

客越志略

四

理卿王氏東窗下共謀者也其軀盡爲遊人擊碎守
祠者加扇墓門乃已墓下邂逅黟中吳山人知李舍
人來杭州住孤山別業舍人家餘姚相國南渠公長
子爲人開美汎愛文采翩翩在都下與余交善聞其
來喜甚從孤山造其門方有貴遊呵聲出松間清吹
金奏湖波麻沸僮輩辟易莫敢問入謁四賢祠四賢
爲唐李鄴侯泌白舍人居易宋蘇學士軾林和靖先
生逋三人皆刺杭州有惠政而林以山中逸民俎豆
其閒信纓綉之不足貴也山之陰卽處士墓野梅數
株偃其傍近土皆乾不知有爵椒漿否北爲放鶴亭

俗子酣嘯其中緬想在陰之聲低回久之而出踏歌
蘇堤上桃葉柳絲存者無幾湖中舊植藕花雲錦燦
爛香氣十里皆豪家所據近柱後惠文惡其妨漁一
時拔去刻石城闔著爲令雖釣徒快心而湖色亡賴
殊寂寂無可觀余意不若散水衡錢於種花之家而
留花娛人庶幾兩利或者謂去花爲西子洗妝無足
怪也遊船大小皆黑猶是南宋遺製惟一二有酒客
餘皆野渡自橫觀察戒嚴人莫敢犯或官令張弛稍
稍攜壺閒出而笙簧粉墨非復當時之舊矣過斷橋
由故路入城歸問逆旅主人知秦觀察書來約余明

客越志略

五

日晚當過邸中是夕篝燈撰祭袁相公文夜分始寐
十九日早訪李舍人於城中寓宅座上遇淨慈寺僧
談藕花居之勝又聞余太史主其家太史鄞人相國
門生薊門同遊也余旣心豔藕花又欲見余君商略
相國文字別李君李君邀遊孤山辭以明日出湧金
門西過清波門外沿湖人家鑿陂種藕青葉田田可
人隔湖望昨日遊處已在寒雲中回首夢境先過淨
慈寺不入逕入藕花居夾道皆士大夫家邱壠烏塚
白楊秋氣瑟瑟居傍臨湖藕花四而木葉露下如金
莖承漢明珠亂飛經云佛宇爲青蓮又云遠公蓮社

以今觀之殆不虛也李君座上僧出迓問余君已出遊昭慶僧打鐘欲留齋飯余意在淨慈遂別去遊淨慈寺倚南屏山周顯德二年錢俶建南渡閒燬而復興山門高棟可當他寺寶殿殿三倍於門采窓百丈龍象如山皆非他刹可侔東廊構田字殿貯五百尊者像作四層相背坐尊尊異形位置曲折屈指多迷余默數亦誤其二家人輩迴環舛訛不覺失聲而笑寺後有蓮花洞居然亭極幽勝聞鳩啼屋上湖面昏昏欲雨不及一探還旅舍岸幘覓高枕而顧杭州貞叔已在門清官瘦馬有古老參軍風氣爲言小官之

客越志略

六

難束帶負弩頭鬚爲白就邀余及建初過飲廨中小屋新麗丹粉光明炊黍擊鮮楚楚充案客子爲之加餐皆捐五斗所爲也秦觀察來顧余不值而去是夕大風木落如秋星辰半在霧氣中中夜雨作

二十日小雨如絲李家使者來相屬問其主人已在湖上供張爲具從早起至今未得自便買輿固請乃乘李家輿先訪秦觀察約日暮留余集衙中辭以湖上之席余獨行出錢塘門過斷橋雨大作衣幘沾濡半透肌肉從者張蓋莫能禦然湖色鴻濛千頃一白一處一奇發狂大咤不知滂沱之在體也湖舩點點

如黑鷗鷁隔烟歌竹枝聲裊裊意不知此曹誰何興
復不淺故當是我輩人李君揖客便誇湖色奇否相
與大噱酒數行揮去携壺登樓萬狀畢獻君問客此
何似水墨畫圖余謂是雲母屏後粉面黛鬢但缺霓
裳按拍李君首肯再四余沾醉頭嘗嘗不能作客命
僕夫易巾車來李君有他約其主人已俟良久隸人
魚貫門外欲俟客去乃去余自謂以西子來意豈在
君推使去去未幾鶯啼過湖音中曲調余悔不留君
去少遲使聽霓裳拍也輿來遂行雨收山出與來時
所見又成異境詩成誦似建初建初亦成一詩佳甚

客越志略

七

若與余對壘然余堅壁待之午後雨益大秦君折簡
來招辭不赴是夜大雨達旦不休

廿二日復大雨出看門外滔滔如江河行人攝衣而
涉杭人堂構簡略瓴甌疏脫不磬瓦溝泄水地皆漫
板如船既無長廊曲阿聯絡參差皆短簷衰牖不蔽
風雨每夏秋淫潦上漏下溼水鳴牀閒泥淖爛漫客
子到門索屐始入因憶吾家高齋蕭森若在天上又
無佳客晤言日對生人作未同語殊無味越中故心
僅一童子鳴流落梁谿不能歸來作東道主人問其
姓名無一知者向人讀其詩亦茫茫不識其佳嗟嗟

高士負俗家邱見嗤朱輪白馬之子黃口未落而名
耀卿閎才一覓之三尺能對若夫逸民有道獨行至
德雖靈珠在握而牆東不聞昔之人如伯鸞執春孺
子磨鏡勾踐酒人韓康藥裹申蟠傭人君平卜肆管
安阜帽仲宣登樓於陵灌園陸通狂歌買臣伐薪麟
士織簾書傳所載莫能盡紀凡此數子者不逢牙曠
卽光消景滅與樞翳栢腐等焉得班班青簡芳香襲
人士有不遇寧獨一子鳴哉雖然白龍魚服得水而
飛羊質虎皮見豺則恐何時一見子鳴把臂慰勞足
下良苦幸毋以彼易此也雨中顧丈來訪衣袍盡溼

客越志略

八

淙淙在地隸人悉從泥中來不能吐氣問有蓋何乃
爾爲言州郡凡謁大府上官雖甚風雨不許持蓋又
不敢直立欄楯下淋漓庭中以爲常乃知柴桑輩不
肯折腰真有以余命沾濁醪爲飲坐中談孫太守事
甚快孫前刺杭州風流蘊藉無俗吏卑庸之氣種荷
花滿湖堤上柳絲成畦荒祠廢殿丹青一新建太虛
樓於吳山絕巘捐俸不給從木客質千金足成其事
樓成望見百里時時與琴酒客來登晝游夕治公事
無留後竟爲言者所中投劾去不知白傅蘇公之曠
達何以見容於當時亦復有沾沾善宦者在耶是夕

雨霽星皆出

廿三日早起欲渡江顧文騎馬來邀遊吳山顧先去約共集三茅觀留隸導余行與建初先過吳山第一泉泉凡五眼銀床石井操罍汲者成市金鱗於物殊不爲潛由大井巷北行人家夾磴道居行漸深山氣漸綠山以伍行人得名訛爲吳或云春秋爲吳南封盡處以別於越一邱一壑支支異稱其實皆吳山也先入中興觀次至德觀登星宿閣江色從樹中來寒動金像又次皮場廟火德廟皆不入入重陽菴觀青衣泉泉出山下深可一尋闊如深之半中爲方池亭

客越志略

九

據其上睨視池面與江光相映一線潏潏作風雨聲龕中青衣爲髻童妝相傳泉所由名也山至此一名寶蓮由菴至城隍廟路逕曲雜江光隱見隨樹疏密山至此一名金地廟後爲太虛樓樓面湖廟臨江干波萬流左顧右盼讀樓下石牌知孫公名孟滁州人文出其手亦琅琅可句隸言孫在郡時栽花彌谷錦繡被磴今悉爲茂草樓空野鵲來巢日方午顧文家人送酒至云主人奉使者檄出郭不能來余與建初飲三茅觀山至此一名七寶欲急過紫陽菴三杯而出紫陽隣霜府設禁甚嚴客一入門卽爲邏者所獲

余以隸自衛得從閒道入一壑瓌瓏雲氣爲碎攢星
簇霞曲曲成境如王家池臺假山餽飭華整松檜蒙
籠不雨翠溼亭中塑丁真人蛻骨丁號野鶴元時於
此羽化遼東令威可謂仙種不乏山至此一名瑞石
總謂曰吳山云大抵杭州諸山無甚勝吳門南金東
箭客自爲寶吳山散而緩越山聚而奏行春星梁何
漸六橋其區萬頃西湖斯下保叔插霞雷峯貫月非
不表表而上方靈巖之浮圖亦復影挂青漢補陀巖
石棧仲伯天台大佛所當北面孤山崕嶮水心松色
如髮何得與太湖一峯比肩藕花居外寬中窄比之

客越志略

十

治平草堂當退三舍紫陽奇詭雲泉競秀城中丹嶂
雲泉所無霞表石梁紫陽亦欠斯亦尺短截長足補
銅坑七寶龍墓九珠白雲長流天池不涸若夫第四
第三具載水經尤非青衣沁雪所能甲乙其餘昭慶
淨慈之流紛紛土木皆籬壁間物何足爲之比論或
謂飛來天竺之邃棲霞靈鷲之雄虎視海宇客皆未
見余家虎邱鄧尉洞庭四飛之屬故亦未經雌黃他
日與越人樗蒲猶可一擲百萬勿云吳兒孤注也與
建初抵掌軒渠杭人聞者皆相顧自失

廿四日顧丈來送別遣隸護行過鎮海樓下出永昌

門青泥一尺負而登舟錢唐江一名浙江秦始皇度
浙江至會稽是也又名曲江又名羅剎桑欽水經以
爲漸水當由浙字之誤西興隔水略如楊子瓜渚所
乏者金焦兩點東望海門羲和正升人言八月潮生
如雪山東傾雷霆鬪鳴爲天下潮聲第一是日風氣
甚恬江流似鏡漏刻未移已達西興

六月十一日還蕭山雨作到西興小晴萬壑齊赴江
流頓高買大舟渡錢唐江海門在烟中不可見入杭
城楊梅滿市問價甚賤欲就顧丈衙齋飽餐以病作
還舟中夜有微月

客越志略

十一

十二日艤舟得勝壩檢校行李遣顧杭州隸歸并問
張觀察元超尙未至雨復大作晚出關門
十五日午還家

附錄詩

塘栖

水闊雨溟溟飛帆去不停人聲兩厓斷魚市一江腥
雲已辭吳白山初到越青侯生數行淚千里弔元經

錢塘夜泊

孤舟三日雨淙淙夜泊錢家舊建邦桑過石門青拂
枕水經橋李黛含窗六橋花盡休攜酒五月潮平好

渡江此去報恩慚烈士匣中龍劍氣難降

送陸丈移官海豐丞

官舍有餘清無言政未成頭從湖上白水在橐中輕
過魯無魚食歸吳借馬行簿書期儻暇一問濟南生

大佛寺

相傳秦皇繫舟石

孤峯成色相片月俯湖中昔繫君王艦今爲佛子宮
面寒山氣在頭綠蘚痕叢莫問秦朝事禪心本自空

岳武穆王墓

松柏前朝墓湖波綠染門腸堪千古斷骨有一坏存
烈士人間淚孤臣地下魂南枝豈無意猶似爲中原

客越志略

三

孤山謁林和靖墓

玉骨舊埋處草堂今半蕪橋名堤土六山色水中孤
墓在梅俱落神歸鶴可呼青蘋不用薦門外是西湖

昭慶寺

兵燹袈裟地壇場一度新佛當興廢劫禪問去來因
市酒僧能戒湖桑寺不貧平生病居士來作社中人

藕花居訪余太史不值

白蓮誰結社十里訪君行載鶴湖中去留僧竹裏迎
看花思寶炬採葉問金莖從此藏書後山將太史名

淨慈寺簡管建初

下馬湖邊寺來參五百尊白蓮依淨社朱塔對慈門
水學禪心定雲將佛面昏不能偕勝侶何似憫羈魂

蘇公堤

芳草路萋萋蘇公舊日堤惟餘數柳臥無復一鶯啼
短艇迷蓮葉輕輿勝馬蹄蕭蕭六橋影斜日自東西

李舍人孤山草堂坐雨

筍輿行過斷橋來樓上銀罌水上開白鳥數行猶似
鶴青山五月已無梅雨昏不辨絲千縷湖綠昏疑酒
一杯幾欲題詩題未得舍人元是謫仙才

贈顧杭州貞叔

客越志略

三

才高誰識顧君平身著青袍世所輕楊柳不曾湖上
看芙蓉元在幕中生馬頭雲斷冢山色官舍潮連夜
雨聲流水白雲心盡折丈夫辛苦爲微名

秦觀察招燕衙齋不赴代簡

東書騎馬去蕭蕭折簡深慚憫寂寥總爲青山元不
住從開白社亦難招花當繡斧寒無色柳近霜臺夏
已彫明日還尋巖子宅聞君曾說富春潮

逆旅書懷寄童子鳴

一片清冰在玉壺爲君求價至今無魯連何必諸侯
貴季布空將一諾孤玉獻楚王元是石瑟過齊國不

如竿還家好泛扁舟去同載紅妝下五湖

織錦辭寄侍兒

燈前織錦雨吹窗忽憶行人未渡江織出鴛鴦才一半待郎歸日始成雙

太虛樓呈顧杭州

黃金不惜起高樓云是當年孫仲謀楊柳曾經過五馬桃花無復識諸侯城中樹白千家夕湖上山寒六月秋莫道風流無繼者尊前今有顧杭州

紫陽菴丁真人祠

丹壑斷人行琪花洞裏生亂厓兼地破羣象逐峯成

客越志略

西

一石一雲氣無松無水聲丁生化鶴處蛻骨不勝清

渡錢塘江

錢塘到曉渡寒霧綠纖纖潮色全隨月江流盡是鹽不知衣袂溼惟有淚痕添何處陳蕃榻傷心老孝廉

武林舟中見月懷建初

武林門外月如鉤乍出還遮不可留莫怪嫦娥光易散隨君今夜在明州

客越志略